

傳
經
堂
詩
鈔

鈔已酉以往所作得古今體詩一千有奇凡十二卷蓋
余年已七十矣憶四歲時 先母教識字卽日授唐詩
一兩首洎六歲就外傳以方受經弗暇也十一歲侍

先君子歸自泗州舟中無事適行笈有右丞集俾余讀
之乃稍知所謂詩者至十三四見諸執友分題刻燭余
亦間有吟咏謬邀許可然此中實無所得也稍長始博
觀漢魏以洎三唐并旁涉宋金元明諸大家覺胸臆間
有流露於不自知者故存詩自壬戌始伏念自少孤露
不得已餬口四方歌食歌事期於自適通籍後雖簪筆
從容宜得盡心於文字而軟塵僕僕求如曩時之低首

牖下含毫吮墨殊不易得及出而之海岱之濱之黔則
案牘填委川涂阻長凡有所作多在馬上枕上亦不復
能自收拾迨重入玉堂而白駒過隙鬢鬢皤然壯盛不
來吟興漸減唯己亥典試雲南重尋陳跡時越半年得
詩較夥丙午奉使入秦新作亦復無幾至徧叨館職書
局怱怱再領成均則以講習爲職輒復累月經旬不成
一句四十餘年薈萃篇什離爲三十四卷聊紀歲時所
謂千金敝帚擁以自私真不堪一噓也新春稍暇徧檢
諸集鈔什之三四未知於古作者何如或不至以浮華
浪蕩蚓竅蠅鳴見擯於大雅則幸矣乾隆庚戌正月中

憲大夫國子監祭酒仍兼教習庶吉士木翁韋謙恒書
於京師宣武門外之長生瓦研齋

傳經堂詩鈔卷一

壬戌至辛未

牛渚懷古

大江乘月泛涼月浸江心一曲高歌罷千秋知己深由
來重意氣此地復登臨袁虎風流在何人是賞音

雜詩

秋風一何勁萬卉忽以空零落固有時豈必在秋風巖
巖千仞山亭亭百尺松霜雪旣已降顏色轉青蔥無此
歲寒姿節操安可同

涼月在高樹朔風入我帷整襟獨起立感時令心悲志

士苦日短發憤亦云遲乘時以努力古人猶可追良璧
或見黠素衣乃爲緇自立良獨難胡不蚤夜思以此審
所尙貞白相與期千秋萬歲名此身安所施

嗟彼桃李花春風逞纖穠紛紛開且落何況霜雪重人
生豈金石世事任磨礱所恃金石心獨立貫蒼穹浮雲
倏忽變浩然盪心胸

惡木不可息盜泉不可飲古昔聖賢人耿介毋乃甚詎
曰惡其名自處良已審近火畏炎炎近水生凜凜君子
慎所往庶幾存真品

王昭君

不恨丹青誤惟期報國恩邊塵如可靖妾命不須論月
送關中騎春歸塞上魂紅顏安社稷青史至今存

清涼山

清涼山上楓葉紅寒螿夜夜鳴秋風清涼山下烟草綠
孤鴈年年沙際宿玉兒轉眼化塵埃金蓮誰更踏歌臺
祇餘天水如雲碧曾染淩波舞袖來

對月

不見故鄉人唯見故鄉月何處子規聲聲啼不歇

送僕歸

杜鵑鳴空林淒淒愁人心春風苦相逼遊子淚滿襟去

年花黃後扁舟渡江走陶潛飢來驅乞食亦云偶今年
芳草肥滯滯猶未歸鷓鴣向南鳥時與心事違白衣與
蒼狗世事如翻手人生不得意胡爲別離久豈憚離別
難但恐親心酸鬢髮漸已白有子聊爲歡家貧無所有
天性頗耽酒愛子賦遠遊爲問開尊否堂上燕子來堂
下碧桃開遙知空庭裏獨立重徘徊念此肝腸拆自顧
無羽翮藉爾寄一言莫憶遠行客

憶弟

葉落空階冷秋風入鬢絲不聞鴻鴈至虛誦脊令詩年
少風塵怯家貧骨肉危寒衣應未製遙念五更時

寄朱道士用左司寄全椒山中道士韻

金壇朱道士逍遙洞天客縱意寫烟霞一水復一石采
藥入深林無由接晨夕山中松子墮往來唯鹿跡

清明敬展 先母孺人厝室

年年此地酹清尊隱痛繁冤忍細論受杖早憂無腕力
縫衣常念有鍼痕萱花何處堪重樹芳草無心又到門
有子不才空長大每思捧檄一招魂

出世菴訪施淡吟秀才不值

故人讀書處曲徑傍山開雨歇青生樹春深綠滿苔老
僧唯習靜野鳥亦無猜正欲叅元理子雲期不來

金陵送七弟崑泉震蒙歸里

弟兄同作客送爾獨還家別淚千行下孤帆一片斜
羊腸悲世路虎尾寄生涯努力承先業休教負歲華

焦山僧貽翠雲草

雙峯頂上產小草重重碎蹙雲爛熳直疑天女翠翹墮
幻作人間烟霧鬢誰從焦巖遠相遺老僧清晨來叩關
龍蔥滿眼翠欲滴可憐託根生深山野性由來愛孤冷
位置宜在陰崖間我憐此草手自植堪與蘭茝同幽閒
莫使炎熇太相逼庶幾長保山中顏

聽琵琶

十五盈盈倚畫屏
四絃輕撥酒杯停
分明秋在龍香上
那許天涯客不聽

九日有懷諸兄弟
時七弟在淮陰
八弟在全椒
大二四兄九弟在家

白雲黃葉滿山村
嬾去登臨自杜門
佳節陡驚霜入鬢
鄉心偏覺鴈銷魂
七人三地分千里
九日雙螯對一尊
遙想故園殘夢裏
也應含淚憶同根

過清流關

東南半壁勢全收
奕奕雄關據上游
五代烽烟餘故壘
一天風雨入殘秋
亂山自向孤城遶
野水還歸別澗流

忽憶醉翁呼不起獨攜尊酒倚高樓

題友人山莊圖

獨有田園樂從容話老農桃花經雨淡麥浪帶雲濃野
水橫孤艇斜陽度遠鐘僊源如可接荷笠便相從

昭關

古路崎嶇不可馳况當烟草織愁時一鞭斜指昭關道
下馬先尋伍相祠

昭關往事最堪悲仗劍孤征正此時亂石四圍殘照裏
幾人能不鬢如絲

聽琴

何處生秋聲泠泠在十指洞庭木葉下湘水幽人起始
知靜者妙此中有至理古音旣微茫箏琶塞滿耳安得
和且平物情盡如此舉頭看山月碧天淨於水

題華秋岳豆棚閒話圖

秋岳名品別字新羅山人錢塘高士也以畫名

與余交
最善

棚陰招得十分涼野老論心話正長坐久不知殘照落
晚風吹出豆花香

登彈指閣作示聞長老

謝太傅
讀書處

古木斜陽外東山跡未沉松風應不改落葉一何深世
事空彈指誰人知此心幾時破塵網同證去來今

隋隄

十里繁華路笙歌動酒樓可憐隄上柳底事不勝秋

題江松泉秀才梅鶴詞卷

松泉名昱字賓谷揚州人

南宋風流繼者誰松泉高與玉田追月生村路疎鐘動

畫出平山返櫂時

幾杵疎鐘月生村路口集中平山堂句也

出門

拂衣將出門稚子牽我衣牽衣良可憐使我車馬遲病
妻遽投杼慷慨前致詞鴻鵠舉千里鷓鴣巢一枝丈夫
志弧矢安能依故帷井曰我操作兒女我扶持努力事
行役母爲居者悲所憂在遠道人情日以非舉世好和

光君獨鄙詭隨嶽嶽懷其方將毋與時違處世有工拙
聖人猶委蛇獨醒物所忌太剛易以虧百鍊化繞指願
君慎所之聞此重徘徊刺刺亦何爲男兒貴壁立千仞
以爲期稟氣旣孤直飢寒固所宜赤手障狂瀾肯爲習
俗移登車不復顧去去天之涯

吳公臺

吳公臺上白雲堆大業曾經駐輦來螢苑秋生荒徑草
雷塘春覆墓門苔歌殘玉樹真如夢曲度楊花事已灰
彈指陳隋盡塵土相逢底用更相猜

平山堂

不見六一翁寒梅自開落唯有江南山羅列猶如昨

送方柱川明經入都兼寄秦劔泉序堂兩孝廉

二首

人生如飛蓬飄泊無定所落落各西東風流別如雨相逢無意間縱談忘爾汝世事升與沉卽此理可睹悲君久顛顛金石出蓬戶知音寧無人造物難爲主浮雲變衣狗榮華委塵土鷄雛翔南海志豈在腐鼠所貴惟立名飢寒非所苦慷慨發狂言頓足更起舞出當共馳驅處當共千古

千古亦何爲聊以自怡悅狂言未及終聞君將遠發仗

劍向北征懷書獻

帝闕重茲棟梁材礪礪故多節况當邳隆時

天子求賢切蛟龍不久藏奈何守其窟翹首望京華兩
秦氣超越去年登賢書今年復小蹶得失亦偶然詎肯
事干謁平生抱負奇與君堪比絜勸君酒一瓢送君歌
一闕行行天之涯蘭蕙任攬結故人如問訊此心抱冰
雪

揚州懷古

邗溝廟

祀吳王夫差

歌舞吳宮事已休千秋猶祀古邗溝怪他夾岸栽楊柳

只占雷塘土一邱

隋隄

錦纜沿隄十里斜
垂楊縷縷自栖鴉
傷心一曲安公子
斷送蕪城好帝家

玉鉤斜

玉樹花纔送落暉
玉鉤斜已喚春歸
無人爲築鴛鴦冢
化作雙雙蛺蝶飛

鷄臺

春蘭秋鞠不須哀
一樣埋香付劫灰
獨有依依江上柳
嫩黃如舊照鷄臺

木蘭院

壁上籠紗舊蹟存
王郎詩句不堪論
儒冠寒餓尋常事
肯受閭黎一飯恩

竹西亭

揚州歌吹路全迷
空說繁華舊竹西
賸有襄陽估人女
舵樓猶唱白銅鞮

題葯上人東軒

闐闐元不遠
茆屋結三間
野鳥自來去
孤雲任往還
此心真出世
何處不深山
莫怪陶彭澤
時時一斂關

題程上舍蕪湖懷古詩後

見說鳩茲一舸

去聲

輕舵樓得句氣縱橫靈風暮捲夫人

廟殘照秋連阿黑營壁壘半荒餘畫角江流如舊繞孤城無端又觸羈人夢不盡懷鄉望古情

訪葯上人不值

空庭堆落葉新月接殘暉何處尋詩好鐘鳴尙未歸

追和亡友施淡吟秀才池陽使院見懷作

秀才名長

春別字曼郎

年三十而歿

故人江上幾行書珍重三年錦不如宿草漫悲螢照處新詩空記雁傳餘半生心力今仍在終古交情死未踈莫道九原呼不起夢中猶復出同輿

清明後二日集程泚江太史篠園得塘字

泉水初新後園林日正長
春熏花氣暖風入草痕香
酒興緣啼鳥詩情在夕陽
未嫌歸去晚明月滿山塘

小漪南修禊用蘭亭序集字

暢遊及禊日觴詠信足娛
相坐引春風寄懷在古初
竹所旣幽靜水亭亦清虛
昔賢若可作斯樂將無殊

平山堂下作

平山堂下路多少遊人去
春風著楊柳依舊吹成絮
欲訪大雷宮烟寒不知處

懷程泚江太史客淮陰同黃北垞江蔗畦作

共有索居歎偏余思更深平生知己感風雨故人心古
渡連芳草高臺帶夕陰月明聞笛夜誰伴倚闌吟

六月十六夜自篠園放舟至平山堂聽徐生彈
琴

一棹隨明月山堂已四更人依松影靜風逼露華清秋
思琴中得詩情雲外生殘星疎欲墮遙聽曉鐘聲

新秋雨中集莎圃

好雨帶秋至濃雲羃高柳淅淅清風生相逢如故友園
亭有餘涼水木淨無垢羣芳漸已歇荷花紅獨守愜此
尋幽情婆娑不知久坐見晚烟籠商意滿林牖

七月廿四日登彈指閣三首

追涼此地慣盤桓
彈指聲中月又殘
知道木樨風漸近
登樓先已怯秋寒

定慧曾同勸上根
蒼茫何處更招魂

謂問長老

文殊尙有傳

衣在

謂卓上人

便欲重叅不二門

秋風幾日客中聞
早見蕭蕭落葉紛
獨有餘曠籠老樹
空庭猶帶六朝雲

城南秋望

疎雨洗林木
卽目皆可戀
出郭不數武
悠然與秋見
微雲翳碧空
山氣儵忽變
漠漠含輕烟
飛鳥意已倦
涼風

生嘉禾穎粟良足羨安得歸蓬蒿力耕守貧賤

行菴秋集

涼颼逼襟裾秋光忽云暮感時萃良朋努力愛幽趣境
寂心益遠長吟倚高樹樹本六代餘藤蘿相交互羣屐
已非昔雲烟尙如故緬懷謝東山落葉滿庭布

古渡橋秋汎

簫聲何處入雲間思在斜橋第幾彎夜靜更無人喚渡
月明空照水潺湲

姑蘇

姑蘇城外烟草黃金颺亂捲生秋霜欲問吳王歌舞處

可憐宮殿都茫茫
不見傾城色
鹿走烏棲空太息
豈知當日卧薪人
一樣成塵留不得
人生常懷百歲憂
爭城割地將何求
孰若生前且行樂
勸君莫唱梧宮秋
可中亭
生公開講堂能令石亦悟
不知生公骨今已歸何處
何如彼頑石千載猶如故

橫塘曲

橫塘水泠泠
清光照人面
所恨隔一膜
妾心無由見
澣衣來橫塘
棄衣在道旁
含愁無可說
獨對兩鴛鴦
儂住橫塘西
郎住橫塘東
相看不相識
郎心可以儂

錢唐詠古

於越行成伍相愁屬鏤終墮
秦吳謀那知狡獪南陽宰
同作寒潮上下浮

三千犀弩鉅功存販豎親沾賜券恩
未免被他羅隱笑
可憐低首事朱溫

冷山萬里贍忠魂歸後翻教死
竄奔麟閣曾標蘇屬國
不應仍說漢孤恩

白鴈南飛感廢興
內人斜畔晚烟凝
摸金校尉來西域
千古傷心更六陵

西泠橋步月

寒烟一帶晚山遮湖上秋光夜更賒獨向西泠橋畔立
月明吹簫是誰家

西湖雜咏

十里西湖映碧天秋風齊上缺瓜船欲尋廢殿無人識
牧馬隄邊拾斷鈿

倚杖閒行覓上方舊時歌舞盡荒涼偶從教伎樓頭過
一片蟬聲噪夕陽

家家畫舫趁新晴板拍紅牙最有情莫向尊前歌小海
人間此是斷腸聲

悞國平章委逝波半閒堂外更如何祇今衰草埋荒徑

惟有秋風蟋蟀多

桐江夜泊

桐江清見底一櫂野雲殘
橘柚紛秋色孤蘆起暮寒
人烟依水碓漁火落沙灘
却憶披裘客生平足釣竿

滕王閣

巍然高閣枕江鄉
帝子風流竟渺茫
祇有翩躚雙蛺蝶
春來依舊覓滕王

西山南浦檻前收
容我低吟鎮日留
一事勝他韓吏部
當年曾未得登樓

徐孺子墓

南州高士此中居千載清風竟孰如太守猶能留卧榻
朝廷無術下徵車空懷古道曾磨鏡何處幽棲舊荷鋤
一束生芻君不媿臨風相弔獨欷歔

百花洲

只此一湖水令人骨亦清亭虛收野色橋古得詩情落
木空階滿輕烟薄暮生絕憐新月照漁艇澗邊橫

讀史

平原喜賓客客亦趨平原豈知僅豪舉相士乃徒然毛
遂不自贊鬱鬱居三年備員適楚國大呂在片言錄錄
十九人誰能按劔前博徒賣漿者伏處巖穴間信陵一

留趙間步相與懽遂趣救魏駕卒使威聲宣不識趙勝
客何如兩人賢葉公好畫龍真龍翻棄捐以此稱好士
虛名何足傳

猗頓起鹽鹽程鄭用冶鑄遂令侯王傾兼使仁義附丈
夫守一經何如千釀酤男兒家四壁何如千鈞布所以
貨殖傳嬉笑有餘怒我師漆園吏齊物理能悟連騎非
所希蓬累安足慮灑削與胃脯鼎食名亦污羸紬皆適
然肯爲郅濁誤

魏其旣封侯勛名冠同列田蚡侍歡宴跪起如子姪一
朝竇氏衰賓客遽中絕武安日驕橫權與人主埒鐘鼓

前堂喧婦女後房溢遂請城南田公然以勢奪寶嬰有
故人酒酣氣益烈怒罵驚四筵睥睨空一切赫赫丞相
威竟爲仲孺折嗟彼市道交何堪與比絜

嬴秦任刀筆明察見淵魚上旣好捷給下亦相矯誣土
崩勢遂成旣躓誰能扶聖人惡利口至理良非迂奈何
漢文帝竟欲拜嗇夫舉措一以乖四方乃爭趨亡可翹
足待何弗鑒前車釋之本貲郎從容竭區區誦說東陽
侯願敦長者愚訥訥是所尙喋喋何所需一言悟明主
守正無阿諛庶幾大臣風千古垂嘉謨

題畫牛

社公雨過春蕪綠
聲聲牧笛穿林曲
恬恬意態各幽閒
一甃一眠兼一浴
誰人巧繪農家情
似勸扶犁計早成
何時歸取牛經讀
夕陽村落事春耕

南州除夕

又見辛盤次第陳
韶華可惜老風塵
燈花影裏難成夢
爆竹聲中獨愴神
出郭縱呼明日權
到家已是隔年人
聊將醕酎消離緒
一任梅開報早春

豫章客舍寄白下故人

楊柳真多事
青青到處生
春歸秣陵樹
愁滿豫章城
文酒人千里
江湖鴈一聲
可憐今夜月
偏是故鄉明

別滕王閣

詞客風流自昔聞
開筵無復舊將軍
張帆欲去仍回首
祇爲西山一片雲

彭蠡

彭蠡渺無際
蒼茫一氣浮
孤山峯突起
九派水爭流
雪浪連吳楚
烟波接斗牛
垂綸空有志
風急下扁舟

彭澤縣

朝發大孤山
暮宿彭澤口
青青山上松
鬱鬱隄邊柳
景物尙依稀
昔時人在否
先生不羈才
軒農胸次有所遇
非三代焉能事五斗
歸來樂天命
田園乃獨守
千載揖

清輝空持一尊酒

荻港

荻港停孤櫂霏霏入暮寒不知春雪到猶作荻花看

魯明江夜泊

魯明江上春水生朝朝桴鼓無停聲我來艤舟日向晚
持杯獨坐空月明忽聽鄉音愁脉脉到家已近心彌迫
故園十里不能歸今宵猶是天涯客

抵家

棖觸鄉心日幾回今朝得見故園梅人隨鴻雁聲中返
舟自鼃鼃窟裏來風雪漫嗟曾破浪鶯花且喜共銜杯

試看兒女牽衣舞那不燈前笑口開

養蠶詞

采桑復采桑朝朝過南陌曉風人面吹清露枝頭滴唯
恐飢我蠶妾行心更迫采葉盈頃筐歸來看蠶食我蠶
眠已起妾身猶未息蠶熟纈新絲寒杼燈前織積此終
歲勞幸得成匹帛紈袴誰家兒綺羅不足惜一曲聽未
終纏頭錦千百

鯖魚

江南四月瓜蔓水銀鱗潑刺隨風起千絲細網橫江張
鯖魚恰上櫻桃市我愛嘉魚味獨殊烹鮮酌酒頻歡呼

玉膾金齋何足數季鷹空說松江鱸忽憶炎天曾入貢
迢遙驛騎相飛送

先皇舉箸念民勞

特詔畧師停採供至今歌頌幾曾忘草野猶餘淚數行
薦熟無由升

寢廟斫鱠登盤不敢嘗

采菱曲

一片波光見底清菱花七出晚風生江南女兒盪輕槳
人在新磨鏡裏行

菱葉參差弄早秋瓜皮艇子話新愁歡心願得深于水

莫似菱根水面浮

湖上風光倒好過蓮歌才罷又菱歌儂如蓮子心偏苦
郎似紅菱刺太多

題畫

幾點青山遠近一灣流水橫斜何事却無漁艇月明隱
入蘆花

團扇歌

團扇當秋風與君忽斷絕莫向篋中藏復恐秋來熱

題畫梅

曾爲寒香載酒瓢孤山烟月夢迢迢橫斜忽向生綃見

又到西湖第六橋

太白樓

屈指開元日誰扶大雅輪先生揮手去千載失詩人寧
使蛟龍得羞教魑魅親吟魂差足慰山與謝公隣

望夫石

朝朝相望淚痕濕妾身化石嗟何及願郎化作飛來峯
與儂並向江頭立

寄徐孝廉位山先生

先生名文靖當塗人三十始讀書不入城市者數十

年所著有竹書紀年統箋管城碩記兩戒山河考禹貢證發等書雍正癸卯舉于鄉屢贖公車年已八十餘矣

此日談經客先生尙典型

三朝頭已白八十眼猶青人列儒林傳天留處士星何時載尊酒一訪子雲亭

太白樓對月

月到三更後依然獨倚樓山光還似畫水氣忽成秋隣寺梵鐘歇遠灘漁火收却疑宮錦客此際或來遊

翠螺峯頂高卧百慮到此俱無惟有松風入夢直將山

月爲徒白雲自來自往黃鳥相對相呼便是人間仙境不知何處蓬壺

賞詠亭

紛紛落葉滿江邊
謝尚風流尚宛然
明月有誰能詠史
秋來無限運租船

登翠螺山頂三台閣

并序

閣在山巔僅三里許
山徑陡而狹故屐齒罕到余
來書院春雨夏暘願莫能遂
七月六日稍有秋意
從萬松中攀援而上登高俯視
百仞一拳盡在目
睫波濤上下瞬息萬狀
翠螺全勝竟爲我有爰作
長歌以貽來者

翠螺高踞江之滸
東南半壁爲門戶
中流鼓櫂幾經過

仰望層巒若眉嫵停舟每願陟其巔無如觸境煩流連
犀然秋渚思溫嶠月照高樓弔謫仙今年我來司講席
晤對此山終日夕捫蘿直上何能遲呼童速蠟登山屐
山中忽見好風吹瑟瑟秋聲入我帷芒鞋竹杖從今始
茗碗詩瓢相與隨蜿蜒直入萬松裏馬鬣龍鱗向人起
此時衆慮已全捐但聽松濤汨雨耳漸高漸覺路崎嶇
延緣仄徑總榛蕪亂石如鉤復如戟指筇緩步難爲趨
徐行未及三里許忽見平岡足延竚始知身已在峯尖
高閣巍然更無侶道士邀余閣上看俯臨下界青巒岼
或起或伏或環拱恍如執笏排千官天門兩山屹相向

斗削巉巖森萬狀對茲亦覺難爭雄
偃僂羣峯詎敢抗
迴頭却望姑孰溪東來一片秋雲低
青山日射峯偏出
白紵烟籠路不迷獨有厯陽隔水面
隱隱浮屠猶可見
估航絡繹翦江行微波不興銷素練
颼颼耳後生飄風
怒濤突出鯨鼈宮山光雲影不能辨
蒼茫一氣浮長空
滿江帆影疑張翼奔騰出沒浪花黑
安得人間此壯觀
萬里長風入胷臆平生肺腑無塵囂
山程水驛任逍遙
每逢巖壑縱幽賞置身直欲淩雲霄
況此峯頭素心在
慙如調飢幾十載譬偕幽客定神交
忽然得之歡自倍
裹糧便欲小勾留洗盡茫茫萬古愁
天外更呼李十二

啣杯與爾聽江流

傳經堂詩鈔卷一終

傳經堂詩鈔卷二

壬申至乙亥夏

蕪湖韋謙恒慎旃

歷陽絕句

司業風流不可親
元和詩格想斯人
春來祇有桃花塢
依舊紅霞覆綠津

寄周學博

勿謂校官冷所志
非溫飽勿謂校官卑
所重在吾道
吾道本聖賢
明德以爲寶
文章乃緒餘
寧計醜與好
豈知關心聲
奈何廢探討
太元好難深
晚節不自保
六代獵浮華
末俗趨儇巧
人心旣如斯
氣運亦可曉
方今文教

隆鄉卹多皎皎一二爭新奇流弊或未矯先正明且清
胡爲弗遠紹唯賴秉道人無使狂瀾倒

五日太白祠

此地非湘水先生是屈原江干逢五日杯酒一招魂詩
與離騷接心同漁父論祠前休競渡愁聽楚歌喧

題史梧岡郡博畫竹三首

避暑真無地何來竹數竿山中秋忽至颯颯晚風寒
淺碧似垂曲徑濃陰疑拂虛堂引起一簾幽夢月明直
到瀟湘

幾箇遙從令署分閉門先已却塵氛向來莫怪心情俗

半載何曾見此君

題三元洞妙遠閣

何年擘石洞絕壁構危樓
龍象空中現鯨鼈足底浮
開牕延落日倚檻送歸舟
小憩渾忘暑風生五月秋

蕭尺木畫壁歌

壁在太白樓下璽泰岱華嶽峩眉匡廬四山皆謫仙生平所遊

歷漁洋山人訛華爲衡蓋踵曠園雜志之誤也

平生愛山水思爲五嶽遊
無如向平之願不得了兀坐
一室徒喁嗽邇來挂席向采石
攝衣直登太白樓太白樓下何
所有但見丹崖翠嶂空中浮
頓使白晝雲烟生滿屋對此恐
有長蛟出沒哀猿愁近看却是
壁上畫老

筆幻出人間。秋日觀縹緲。插天際秦松。漢柏紛龍蚪。玉
女洗頭盆。宛在巨靈仙。掌痕猶留匡廬奇。秀甲天下石
門瀑布爭飛流。大峨小峨兩山峙。積雪倒映瞿唐舟。麻
皮斧劈皴法異。荆關巨手誰能儔。謫仙平生拄杖處。一
一都向四壁收。錦袍烏帽騎鯨客。夜深放悲來吟謳。若
非畫師腕底有邱壑。青山白紵安足供優游。我來坐卧
已一載。胷襟披豁開雙眸。東西二嶽在懷袖。暮登香爐
朝眉州。譬如列子御風去。一日能使萬里周。嗚呼人生
遊踪不能徧江海也。須向此棲息。數寒暑。聊以消胷中
之煩憂。

觀音閣納涼

愛此一林月鐘殘到上方松杉饒古意
蒼苔得清香地迴心無暑雲深夢亦涼
始知物外妙便欲事空王

夜坐

夜坐寂無語微聞絡緯鳴山中猶六月
何事已秋聲

月下讀書示二三子

年來二毛生兩眼漸昏眩月下披殘編
焉馬幾莫判迴思十年前燈殘意未倦
把卷當蟾蜍頭字可見奈何久行役精
銷形亦變流光無停車轉瞬去如箭所以
古志士日夕不遑宴願亟乘餘明努力
事書卷後生其鑒

余慎勿恃婉孌

秋夜

羣動忽然息涼風吹樹顛秋懷生永夜吟思入遙天看
月頻移坐聽松竟失眠人間清曠所此妙共誰傳

故鄉雜詠

并序

余自幼隨冷宦依依苜蓿之盤長踏芳洲采采蕙
蘭之草以故半生踪跡多在他邦遂令十畝田園
翻成傳舍雖燕歸堂上或爲累月淹留而鶯老花
間未得三年久住偶因秋氣倍觸鄉心憶往日之
登臨山川宛在想曩時之觴詠烟景寧非爰成小

律以抒懷用託五言而寄意

赤鑄山

千將鑄劍處山氣尙氤氲
宰堵凌霄見蒲牢帶月聞
搗筇曾極目看盡楚天雲

范蘿山

出郊頻載酒多在范蘿陰
帆影夕陽淡人烟秋樹深
無窮詩思在月上更幽尋

螭磯

靈祠依片石不盡水迢迢
環珮聲何在魚龍氣獨驕
憶從風雨夜一枕聽寒潮

滴翠軒

涪翁不可見猶有讀書堂
碧樹留餘蔭蒼苔得古香
徘徊每終日山翠濕衣裳

出世巷

蒲菴剛十笏鐘磬有清音
忽到無人境真生出世心
舊時幽夢在殘臘記微吟

辛酉除日同亡友施
淡吟文學于此賦詩

崇仙院

探梅何處好第一是崇仙
深院銷殘雪寒香幕晚烟
不知湖水畔誰醉早春天

宜園

湖上堪吟眺宜園景最寬山爲屏障列人作畫圖看記
得春愁滿風前一倚闌

吸川閣

最憶嬉春日
前村覓酒家
雲開孤閣出
風濤一帘斜
好景憑誰畫
妖嬈有杏花

虞雍公祠

南宋遺祠荻葦秋
犒師曾此扼咽喉
奇勲竟使書生立
遠略難從肉食謀
祖逖有心扶帝室
晉元無詔復神州
祇今采石磯邊水
一片濤聲恨未休

歸里

嗟我乃旅人東西事行役經年不遑歸鄉心日夜積幸
得解轡銜重遊舊井陌弟兄共存問執手訊踪跡瑣語
豈厭詳煩憂忽已釋始知天倫樂千金未能易憶昔趨
庭闈長枕夢酣適奈何喬木凋治生竟無策飢驅向四
方飄零詎足惜所悲同氣人形骸每相隔行者誠勞勞
居者亦脉脉安得二頃田兼之五畝宅出入長與偕耕
讀任所擇

長門曲

月華偏爲照長門舊日霓裳盡淚痕不惜朱顏漸蕉萃
可憐無路報君恩

識舟亭晚眺

危亭突兀枕寒流，鄉國登臨落木秋。
城郭參差烟樹接，江山平遠畫欄收。
一聲風笛聞新曲，幾處霜砧起暮愁。
翻憶頻年作遊子，有人長此盼歸舟。

靈澤夫人祠二首

東吳霸業竟全荒，贏得紅顏有瓣香。
歸妹當年真下策，寒潮終古恨周郎。

永安宮闕草萋萋，蜀道魂歸路已迷。
最是春風聽不得，年年猶有杜鵑啼。

春日同人徧遊翠螺諸名勝至觀音閣分得萍

字

翠螺山色向人青到處松風倚杖聽苔蘚三春埋故壘
波濤終古撼空亭襟懷畧似沙邊鳥踪跡真如水上萍
最愛已公茅屋下一竿斜日透疎櫺

絕句

長晝卧空山興來時獸醉櫻桃紅漸稀猶有幽禽至

述懷四首

殃慶唯所召坤輿本無權咄哉青烏子形勝生拘牽覆
舟與運繖紛紛胡爲傳靈鐘應銅山此喻恐不然高堂
厭塵世全歸已有年忍以先人軀邀福求牛眠所苦在

貧乏買山無其錢何時卜兆域躬耕依墓田私願不能
遂煩憂中心煎臯魚有餘恨此恨尤絲絲

我聞桓山鳥啾啾相與依一旦羽翼成四海將分飛哀
鳴不能已聽者皆歔歔以彼無知物尙悲生別離而我
得靈秀忍與骨月違蓼蟲心獨苦相知復爲誰嗟余方
舞象萱花儵以萎彈指剛十年更遭風木悲煢煢日在
疚同氣相肩隨旣無田可耕辟穀何能爲駕言遠遊遨
聊取八口資年來竭心力門戶空支持婚嫁爲弟妹兩
鬢新霜垂詎云篤手足唯恐乖天壤異鄉各黽勉欣聚
當有時聖經著明訓雍睦家之肥

吾家雖世宦皆以廉潔聞至今鄉里間往往稱清芬坐
此守貧賤一介猶斤斤唯恐稍失足遂至先德泯頻年
入講席觚翰爲耕耘當路謬折節車馬來紛紜胡爲寡
識者暮夜通殷勤平生恥私謁閉關辭故人明珠豈不
好苟得非所欣

春風拂庭戶草木皆欣榮景物良亦佳感時獨心驚回
首憶曩昔意氣何崢嶸碌碌復碌碌坐令節序更少壯
不再得安能崇令名惟有望來者庶幾振家聲有兒當
齟齬炯炯雙青睛讀書僅三載知識畧已萌推曾非所
慮驕情恐易生譬彼璠璣不雕胡能成何當早還鄉

遂此傳經情

江上

江上逢初夏炎氣已隨忽然襟抱冷高詠左司詩

秋夜對月

涼風生秋樹清露沾衣襟僧樓鐘已歇倚檻猶高吟仰
天看山月何人知此心

喜金棕亭孝廉至

屏跡遠闌闔譚經依高岑日夕手一卷危坐獨整襟生
徒豈不樂無如少規箴中夜睠良友暮雲深復深空谷
忽蹙然歡笑何能禁執手無別語索我山中吟疑義析

微渺相期追古音吾儕非道義胡爲稱同心故人心乃
爾直諒誠所欽我有一尊酒與君共酌斟皎皎明月影
鬱鬱夏木陰涼風生衣袂悠然彈素琴此中有詩意可
以供幽尋

久雨

漲已添三尺傾盆竟不休山風張雨勢湖水奪江流橋
斷舟相接村深浪欲浮憑誰呼日馭一起救田疇

讀史

兄弟翩翩武帝兒傷心終古是陳思如何八斗才名擅
殿上徒吟七步詩

三台閣卽事二首

蠟屐來峯頂丹房正下簾樓間花滿地盧橘實垂檐劫
火留殘碣間曾煨于火有碑爲先大夫篆額尙存烟雲入素練壁懸蕭尺木畫凭
闌動詩思塢影露雙尖

斜陽曾極目蘸筆起微醺山古仍秋氣天空忽夏雲帆
檣烟際出樓閣樹中分清夢誰能共松風祇獨聞

古柏行

翠螺山上古柏多長風颯颯生巖阿太白樓前更奇絕
不知幾經冒霜雪千尋獨立參青霄森森可憐含孤標
紅羊灰劫閱今古青銅顏色尙如許我愛此樹來高吟

六月寒氣何陰森
婆娑不覺忘日夕
豈爲茯苓與琥珀
曾聞大木靈氣鍾
安能空老深山中
輪囷古幹不易得
此材奈何終默默
作詩聊語般與輪
采爲宮殿梁何如
次答吳杉亭舍人過翠螺見訪

官橋折柳思茫茫
何意重攜畫省郎
一榻松聲醒午夢
半江帆影落斜陽
登樓把酒神俱王
對月哦詩骨亦涼
但使故人能握手
未妨長寄水雲鄉

登姑孰城樓

丹陽城接大江流
雉堞猶餘六代秋
白紵歌隨元子去
青山名爲謝公留
樓臺迢遞輕烟合
吳楚微茫落照浮

最喜女牆吟眺處鳴榔聲動見漁舟

山行絕句

重重山樹染霜紅
小李將軍著色同
却笑指顧貪覓句
渾忘身在畫屏中

對雪

一夜松風謾謾吹
曉來忽見雪霏微
叩門有吏驚猶卧
問字何人尙未歸
已約梅花同耐冷
更邀鷗鳥共忘機
苦吟莫憶年時事
彈指梁園跡已非

書懷

頻年踪跡滯風塵
且傍閒鷗息此身
壯志肯從泉石老

疎懷合共水雲親漫嫌雞肋真無味猶恐猪肝或累人
閉戶著書差不負茫茫底用計亨屯

題司馬相如長門賦後

一入長門萬里深能將詞賦感君心可憐千古淩雲氣
只博文君取酒金

漂母祠二首

靈祠落日薦清尊千古難忘一飯恩太息南昌亭長媿
當年應悔失王孫

千金猶見古人風施者雖忘報已豐却問誰人釋壯士
九原能不負滕公

淮安夜泊懷周白民明經

藹藹城中雲湯湯城外水雲水兩相涵幽人阻尺咫夜
靜羣動息灑然絕塵滓安得素心偕與之談妙理

嶧山

落日散平野孤峯分外明秦碑何處覓唯有白雲橫

陳思王墓下作

細草蕭蕭古墓春君王詞賦未成塵靈均哀怨無人識
只道微波感洛神

留侯祠

留侯狀貌如女子報讐乃欲爲韓死崎嶇獨求倉海君

三百家僮如脫躡奮身一擊博浪沙大索不得偶然耳
卒出奇計除嬴秦勛名直與蕭韓比遂從赤松棄人間
功成拂衣可去矣祇今祠宇猶巍巍穀城黃石共終始
男兒不負故主恩成固欣然敗非恥不見橋邊吞炭人
拔劍擊衣重青史

趙北口

泠泠淀尾水燕趙此中分終古餘垂柳長隄帶夕曛市
烟迎馬見漁唱隔橋聞風景江南似迷漫暮片雲

獻縣

縣真如斗大猶爲獻王名劫火遺經在寒烟古墓平樓

鷗生暝色歸鴈帶秋聲只有滹沱水年年抱故城

送蕭孝廉歸楚二首

酒鱗相對落花天穎士才名正綺年三月羈愁濃似水
春潮又送孝廉船

陶陶真樂在庭除粉署蘭臺或不如飲水幾時歸建業
妬他先食武昌魚

雜憶四首

菽水歡殘又十春遺書幾卷澤猶新年華鼎鼎成逋客
天地茫茫一鮮民羞說鳳毛空落魄每思馬鬣倍傷神
他鄉寒食忽忽過濁酒難澆淚滿巾

荆樹花開滿地垂同株何事隔天涯生當有道偏貧賤
歸豈無家竟別離風雨夢憐池草合稻粱心祇塞鴻知
近來第一關心甚弱弟無衰歎在淇時九弟尚未娶

一鉤新月影纖纖遙憶深閨正下簾魚素恰從天外寄

刀環虛向夢中占漸拋書史因兒女內子書至云久不展卷矣盡典

釵帚爲米鹽蔗境倒餐真迂汝半生辛苦幾時甜

中年身世易欷歔賴有佳兒足慰予千里湖山行役久

一庭燈火義方疎塗鴉且學官奴帖刻鵠應思馬援書

時命受經于九弟寄語乘時須努力阿翁堪取作前車

潞河城樓送江孝廉南歸

君家西子湖湖光如澹粧中有冷泉冷一飲心骨涼胡
爲踏軟紅入此熏灼場爨無欲清人內熱不可當素衣
冑化緇飄然治歸裝庶幾抱本性吾生聊相羊我本非
熱客栖栖謀稻粱冰雪雖未改塵埃避無方安得脫羈
縲天宇隨翱翔送君城上樓白水何茫茫糧艘東南來
雁齒排牙檣趁此挂帆去離別非所傷他時定買櫓放
鶴來君鄉

同丁編修李進士王孝廉坐月用東坡定惠院
寓居月夜偶出韻

棗花滿院飄清香涼月娟娟孤夜今雨舊雨翩然來

脫帽露頂在花下千頃烟波迎面生九天珠玉向懷瀉
石邊蒼蘚殊爛熳牆畔紫藤正低亞風光如此不作達
良宵更從何處借歎我年時太鹿鹿川涂坐使滯華謝
結交空欲攀雲霞對客豈知問田舍只有浮名似畫餅
曾無佳境同食蔗異趣王孫劇可憎假威狐魅良堪怕
何如相與文字飲高歌一任羣兒侮

戊午春與虞錦亭吏部遊靈巖穹窿鄧尉諸山
比於都門話及舊遊宛如昨日彈指已十有七
年矣燈下作詩三十四韻

平生重意氣傾蓋金可斷况復故心人詎以車笠判酒

冷歡未竭燭跋語豈調觀縷溯昔遊歷歷僅昏旦憶初
識虞卿小子方弱冠論文獨心許綢繆每日肝山水有
夙緣登臨情汗漫並坐鴨觜船直指吳宮畔靈巖如美
人烟雲作帷幔朝來倍明媚嶺盡璀璨歌舞塵雖空
綺羅香未散洞口流清泉微嚙不忍盥明發移小艇冒
雨陟高岸林宗巾已墊阮孚屐屢換遂造穹窿顛飄然
在霄漢太湖水茫茫波濤喧几案迴首姑蘇城隱隱大
於彈更聞仙靈窟鄧尉冰乍泮石徑縱盤紆竹杖詎慵
慳春風吹四野寒香開已半疎影橫前谿繁枝插遠
厓拈花得妙理微笑不能贊雲深見僧歸日斜聞鳥喚譬

遊武陵源來路已迷亂

是夕迷道

賴有月到林忽得舟在汴

佳境入肺腑儼若圖可按轉瞬十七年相顧各悽惋君
蚤騰天衢立朝能侃侃而我尙伏櫪兼之受羈絆青春
去堂堂安足供把玩無如烟霞癖興來時獨粲相隨在
帝鄉雲龍倘爲伴西山正奇絕拄笏便同看何必懷吳
山臨觴更興歎

去年冬郭奉墀侍講卒于道欲作詩弔之輒鳴
咽不成聲頃客潞河與雙彭兩侍郎共話亦有
逝者之歎爰成斷句八章雖墓草將宿而淚潞
潞不能止也

驪歌猶記趲斜暉一食飛魚竟不歸縱道寧封聊暫死
再來人事已全非

旅櫬迢迢返故鄉人間轉眼卽滄桑西州門外歌華屋
不獨羊曇爲斷腸

赤子依依戀墓門哀猿聲斷欲黃昏祇今翁仲埋秋草
尙有臯魚舊淚痕

將北行于其先人墓號泣數日

馬援家風差足比

教兄子極嚴

鄧攸天道更難論九原知不

憂身後詩卷還堪作子孫

白首青山句苦吟鸞膠那肯負初心傷神奉倩應無憾

此日同歸到故林

青山定有同歸日白首難忘後死期其悼亡句也

廿載西清侍從臣朝衫猶有

帝京塵譚經嶽嶽真儒者不信前身是化人

未卒先三月縣吏某

夢一廳事上坐如王者狀侍講衣朝衫來謁尋易僧衣躡空去

桑下元無三宿戀山中舊有百年盟刻舟求劍非癡絕

知己茫茫感易生

聲華奕奕在詞場說到風流盡惋傷有道裨真無媚色
莫將諛墓訝中郎

種竹次有亭先生韻

秋至生涼颺庭砌收殘潯凡卉忽已空菀枯胡太促簪
與君子聯勁節誰爲易森森何處來空翠竟吾屬寧辭

荷鋤勞幸免無竹俗清泉灌其根生意良可贖從此白石
闌頰添筍如玉千畝富何爲雨叢趣已足披拂虛亭
間微雲暎新綠吟罷夢亦幽幽迢迢湘江曲

秋曉

蕭疎林圃占清秋曉月初沉露未收却訝紅閨貪睡美
短籬花態負牽牛

種竹後連得雷雨生意勃然喜而有作

寒光煜煜飛金蛇阿香睡醒推輕車白雨跳珠亂入戶
籜龍坼地爭抽芽此君孤直處空谷結交青松奴羣葩
誰爲驅之至闌闔顚顚獨立薶塵沙幽人相見忽相賞

三薰三沐移來家朝朝抱甕勤灌溉枝葉未茂頻咨嗟
天公憐爾久沉鬱欲催高節凌烟霞故挹銀河相傾注
使之滋潤生光華結實行看集鸞鳳蓬山浮筠安足誇
物理榮悴固乃爾待時旣至誰能遮

懷翠螺書院諸弟子

十丈塵中寄此身靈犀差喜不沾塵跡如鰲衍來燕市
心似廉頗憶趙人高詠尙疑聞月夜秋懷先已落江濱
應知載酒元關外也爲離羣悵望頻

送人之紹興

楊柳蕭蕭不忍攀片帆催爾去江關郵籤細數真佳絕

卧看吳山又越山

朝南暮北風初試高士遺蹤問若耶一抹青山斜照裏
烟寒何處謝敷家

三河驛題壁

土銼殘燈在蝸廬膝可容故園初到枕違寺又聞鐘霜
重明荒驛烟寒入亂峯勞薪吾已慣酤酒一開甬

薊州

北平城外月痕新聞道將軍射入神亂石祇今如虎踞
短衣夜獵更何人

別山晚行

策馬問前路蕭蕭入翠微
風燈殘驛館霜月冷征衣
野犬當村吠棲鷗見客飛
勞勞思息駕聊此叩禪扉

戲詠柳木牙杖

一點迷藏入左車
楊枝解與爲搜除
憑將牙後遺芬拾
要使頤中宿物虛
觸手慣尋殘缺處
攢眉因識動搖初
東方老去應相賴
編貝偏宜割肉餘

懷江蔗畦通判長沙二首

醴陵別後酒懷孤
聞道湘江正佩符
三十六灣秋水碧
不知清似使君無

爾汝交情記昔時
叩牀收處定相思
平生不欲當人惠

片紙惟求嶽麓碑

看奕

一局圍碁日已殘紛紛得失總無端
笑僂太不關情甚袖手唯從壁上觀

夏日靜坐

夏木日以茂蔭此讀書廬好風時一吹
習習生衣裾寂坐聞槐香鼻觀何清虛
偃仰任所適天地皆有餘靜中得真趣
何時非古初睠彼勞勞客日暮無停車

潞陽五日

一杯蒲酒竟陶然竹簟涼風許晝眠
鄉夢已歸千里外

水嬉空憶十年前靈符只乞安心法慧劍唯參自在禪
最是晚來幽趣足古槐疎柳聽新蟬

次姚念慈徵君韻論詩

醉後論詩興若何一杯新茗試松蘿任推綺麗齊梁好
終愛光芒李杜多壁壘如山真上將肌膚似雪卽仙娥
廿年悔託雕蟲技落筆無由脫日窠

謁文信國祠二首

終古猶存鐵石肝孤臣謀國太艱難手提一旅思興夏
家散千金爲報韓破碎山河留碧血荆榛天地獨黃冠
朝周玉馬吳興老應到祠邊忍淚看

許國何曾更有身雪霜歷盡後凋真
浙潮早識天心去
燕市終將正氣伸
俎豆祇今成夙志
公少入鄉先生祠見皆謚忠節欣然
日沒不俎豆
科名一代得斯人
公對策第一試官謂其忠肝如鐵石以得人資
冬青樹下忠魂在
賜斷年年杜宇春

傳經堂詩鈔卷二終